

# ॥ तैत्तिरीय संहिता ॥

## ॥चतुर्थः प्रश्नः॥

### ॥तैत्तिरीयसंहितायां द्वितीयकाण्डे चतुर्थः प्रश्नः॥

देवा मनुष्याः पितरस्तेऽन्यत आसन्नसुरा रक्षांसि  
 पिशाचास्तेऽन्यतस्तेषां देवानामुत यदल्पं लोहितमकुर्वन्तद्रक्षांसि  
 रात्रीभिरसुभ्रन्तान्सुब्धान्मृतानभि व्यौच्छुते देवा अविदुर्यो वै  
 नोऽयं म्रियते रक्षांसि वा इमं घ्नन्तीति ते रक्षांस्युपांमत्रयन्त  
 तान्यब्रुवन्वरं वृणामहे य- (१)

दसुराञ्जयाम तन्नः सहासदिति ततो वै देवा असुरानजयन्ते-  
 ऽसुराञ्जित्वा रक्षांस्युपांनुदन्त तानि रक्षांस्यनृतमकर्तेति समन्तं  
 देवान्पर्यविशन्ते देवा अग्नावनाथन्त तैऽग्नये प्रवन्ते पुरोडाशमष्टा-  
 कपालं निर्वपन्नग्नये विबाधवन्तेऽग्नये प्रतीकवते यदग्नये प्रवन्ते  
 निर्वपन् यान्येव पुरस्ताद्रक्षांस्युस्या- (२)

सन्तानि तेन प्राणुदन्त यदग्नये विबाधवन्ते यान्येवाभितो  
 रक्षांस्युस्यासन्तानि तेन व्यबाधन्त यदग्नये प्रतीकवते यान्येव  
 पश्चाद्रक्षांस्युस्यासन्तानि तेनापांनुदन्त ततो देवा अभवन्परासुरा  
 यो भ्रातृव्यवान्स्यात्स स्पर्धमान एतयेष्ट्या यजेताग्नये प्रवन्ते  
 पुरोडाशमष्टाकपालं निर्वपेदग्नये विबाधवन्ते- (३)

ऽग्नये प्रतीकवते यदग्नये प्रवन्ते निर्वपन्ति य एवास्मा-  
 च्छ्रेयान्भ्रातृव्यस्तं तेन प्र णुदते यदग्नये विबाधवन्ते य एवैनैन

सृष्ट्वं तेन वि बाधते यद्ग्नये प्रतीकवते य एवास्मात्पापीयान्तं  
तेनाप नुदते प्र श्रेयांसं भ्रातृव्यं नुदतेऽति सृष्टशं क्रामति नैनं  
पापीयानाप्नोति य एवं विद्वानेतयेष्ट्या यजते॥ (४)

वृणामहे यत्पुरस्ताद्रक्षांसि वपेद्ग्नये विबाधवन्त एव चत्वारि च॥ [१]

देवासुराः संयत्ता आसन्ते देवा अब्रुवन् यो नो  
वीर्यावत्तमस्तमनुं समारभामहा इति त इन्द्रमब्रुवन्त्वं वै  
नो वीर्यावत्तमोऽसि त्वामनु समारभामहा इति सोऽब्रवीत्तिस्रो मं  
इमास्तनुवो वीर्यावतीस्ताः प्रीणीताथासुरानभि भविष्यथेति ता वै  
ब्रूहीत्यब्रुवन्त्रियमं होमुगियं विमृधेयमिन्द्रियावती- (५)

त्यब्रवीत्त इन्द्रायां होमुचै पुरोडाशमेकादशकपालं  
निर्वपन्निन्द्राय वैमृधायेन्द्रायेन्द्रियावते यदिन्द्रायां होमुचै  
निर्वपन्नं हंस एव तेनामुच्यन्त यदिन्द्राय वैमृधाय मृध एव  
तेनापाघ्नत यदिन्द्रायेन्द्रियावत इन्द्रियमेव तेनाऽऽत्मन्नदधत्  
त्रयस्त्रिंशत्कपालं पुरोडाशं निर्वपन्नयस्त्रिंशद्वै देवतास्ता इन्द्र  
आत्मन्ननु समारम्भयत् भूत्यै (६)

तां वाव देवा विजितिमुत्तमामसुरैर्व्यजयन्त यो  
भ्रातृव्यवान्त्स्यात्स स्पर्धमान एतयेष्ट्या यजेतेन्द्रायां होमुचै  
पुरोडाशमेकादशकपालं निर्वपेदिन्द्राय वैमृधायेन्द्रायेन्द्रियावते-  
ऽहंसा वा एष गृहीतो यस्माच्छ्रेयान्भ्रातृव्यो यदिन्द्रायां होमुचै

निर्वपत्य॑ हंस एव तेन॑ मुच्यते मृधा वा एषो॑ऽभिषण्णो  
यस्मा॑त्समा॒नेष्वन्यः श्रेया॑नुता - (७)

ऽभ्रातृव्यो यदिन्द्रा॑य वैमृ॒धाय॑ मृधं एव तेनाप॑ हते  
यदिन्द्रा॑येन्द्रि॒याव॑न्त इन्द्रि॒यमे॒व तेना॒ऽऽत्म॑न्धत्ते त्रय॑स्त्रि॒ंशत्क॑पालं  
पुरो॒डाशं॑ निर्वपति॑ त्रय॑स्त्रि॒ंशद्वे॑ देवता॒स्ता एव॑ यज॑मान आ॒त्मन्न॑नु  
स॒मार॑म्भयते भूत्यै सा वा ए॒षा विजि॑तिर्नामेष्टिर्य॑ एवं वि॒द्वाने॒तये॑ष्ट्या  
यज॑न्त उत्त॒मामे॒व विजि॑तिं भ्रातृ॒व्येण॑ वि ज॑यते॥ (८)

इन्द्रियाव॑न्ती भूत्या॑ उत्तैका॒न्नपञ्चा॑शच्च॥ [२]

देवा॒सुराः संय॑त्ता आस॒न्तेषां॑ गाय॒त्र्योजो॑ बल॑मिन्द्रि॒यं वी॒र्यं॑  
प्र॒जां प॒शून्स॒ङ्ग॒ह्यादा॑याप॒क्रम्या॑तिष्ठत् ते॒ऽमन्य॑न्त यत॒रान् वा  
इ॒यमु॑पाव॒र्त्स्यति॑ त इ॒दं भ॑विष्य॒न्तीति॑ तां व्य॑ह्रयन्त॒ विश्व॑कर्म॒न्निति॑  
दे॒वा दा॑भीत्यसुराः सा नान्य॑त॒राःश्च॑ नोपाव॑र्तत॒ ते दे॒वा  
ए॒तद्य॑जु॒रप॑श्य॒न्नोजो॑ऽसि॒ सहो॑ऽसि॒ बल॑मसि॒ (९)

भ्राजो॑ऽसि दे॒वानां॑ धाम॒ नामा॑सि॒ विश्व॑मसि॒ विश्वा॑युः सर्व॑मसि॒  
स॒र्वायु॑रभिभूरिति॑ वाव दे॒वा असु॑राणा॒मोजो॑ बल॑मिन्द्रि॒यं वी॒र्यं॑ प्र॒जां  
प॒शून्वृ॑ञ्जत॒ यद्गा॑य॒त्र्यप॒क्रम्या॑तिष्ठत् तस्मा॑दे॒तां गा॑य॒त्रीती॑ष्टिमाहुः  
संव॑त्स॒रो वै गा॑य॒त्री संव॑त्स॒रो वै तद॑प॒क्रम्या॑तिष्ठद्यदे॒तया॑ दे॒वा  
असु॑राणा॒मोजो॑ बल॑मिन्द्रि॒यं वी॒र्यं॑ (१०)

प्रजां पशूनवृञ्जत् तस्मादेताः संवर्ग इतीष्टिमाहुर्यो  
 भ्रातृव्यवान्स्यात्स स्पर्धमान एतयेष्ट्या यजेताग्रये संवर्गाय  
 पुरोडाशमृष्टाकपालं निर्वपेत्तः शृतमासन्नमेतेन यजुषाऽभि  
 मृशेदोज एव बलमिन्द्रियं वीर्यं प्रजां पशून्भ्रातृव्यस्य वृद्धे  
 भवत्यात्मना परास्य भ्रातृव्यो भवति॥ (११)

बलमस्येतया देवा असुराणामोजो बलमिन्द्रियं वीर्यं पञ्चचत्वारिंशच्च॥ [३]

प्रजापतिः प्रजा असृजत् ता अस्मात्सृष्टाः पराचीरायन्ता  
 यत्रावसन्ततो गर्मुदुदतिष्ठत् ता बृहस्पतिश्चान्ववैताः सो-  
 ऽब्रवीद्बृहस्पतिरनयां त्वा प्र तिष्ठान्यथ त्वा प्रजा उपावर्त्स्यन्तीति  
 तं प्रातिष्ठत् ततो वै प्रजापतिं प्रजा उपावर्तन्त यः प्रजाकामः  
 स्यात् तस्मा एतं प्राजापत्यं गर्मुतं चरुं निर्वपेत्प्रजापति- (१२)

मेव स्वेन भागधेयेनोप धावति स एवास्मै प्रजां प्र जनयति  
 प्रजापतिः पशूनसृजत् तैः अस्मात्सृष्टाः पराश्च आयन्ते यत्रावसन्ततो  
 गर्मुदुदतिष्ठत् तान्पूषा चान्ववैताः सोऽब्रवीत्पूषाऽनयां मा प्र  
 तिष्ठार्थं त्वा पशवं उपावर्त्स्यन्तीति मां प्र तिष्ठेति सोमोऽब्रवीन्मम  
 वा - (१३)

अंकृष्टपच्यमित्युभौ वां प्र तिष्ठानीत्यब्रवीत्तौ प्रातिष्ठत् ततो  
 वै प्रजापतिं पशवं उपावर्तन्त यः पशुकामः स्यात् तस्मा एतः  
 सोमापौष्णं गर्मुतं चरुं निर्वपेत्सोमापूषणावेव स्वेन भागधेयेनोप

धावति तावेवास्मै पशून् जंनयतः सोमो वै रेतोधाः पूषा पशूनां प्रजनयिता सोम एवास्मै रेतो दधाति पूषा पशून् जंनयति॥ (१४)

वृषेज्यजपति वै दधाति पूषा त्रीणि च॥ [४]

अग्ने गोभिर्न आ गृहीन्दो पुष्ट्या जुषस्व नः। इन्द्रो धर्ता गृहेषु नः॥ सविता यः सहस्रियः स नो गृहेषु रारणत्। आ पूषा एत्वा वसु॥ धाता ददातु नो रयिमीशानो जगत्स्पतिः। स नः पूर्णेन वावनत्॥ त्वष्टा यो वृषभो वृषा स नो गृहेषु रारणत्। सहस्रेणायुतेन च॥ येन देवा अमृतं (१५)

दीर्घं श्रवो दिव्यैरयन्त। रायस्पोष त्वमस्मभ्यं गवां कुल्मिं जीवस आ युवस्व। अग्निर्गृहपतिः सोमो विश्ववनिः सविता सुमेधाः स्वाहा॥ अग्ने गृहपते यस्ते घृत्यो भागस्तेन सह ओज आक्रममाणाय धेहि श्रेष्ठ्यात्पथो मा योषं मूर्धा भूयासुः स्वाहा॥ (१६)

अमृतमष्टात्रिंशच्च॥ [५]

चित्रया यजेत पशुकाम इयं वै चित्रा यद्वा अस्यां विश्वं भूतमधि प्रजायते तेनेयं चित्रा य एवं विद्वाश्चित्रया पशुकामो यजते प्र प्रजया पशुभिर्मिथुनैर्जायते प्रैवाऽऽग्नेयेन वापयति रेतः सौम्येन दधाति रेत एव हितं त्वष्टा रूपाणि वि करोति सारस्वतौ भवत एतद्वै दैव्यं मिथुनं दैव्यमेवास्मै (१७)

मिथुनं मध्यतो दधाति पुष्ट्यै प्रजननाय सिनीवाल्यै चरुर्भवति  
 वाग्वै सिनीवाली पुष्टिः खलु वै वाक्पुष्टिमेव वाचमुपैत्यैन्द्र उत्तमो  
 भवति तेनैव तन्मिथुनं सप्तैतानि हवींषि भवन्ति सप्त  
 ग्राम्याः पशवः सप्तारण्याः सप्त छन्दांस्युभयस्यावरुद्धा अथैता  
 आहुतीर्जुहोत्येते वै देवाः पुष्टिपतयस्त एवास्मिन्पुष्टिं दधति  
 पुष्यति प्रजयां पशुभिरथो यदेता आहुतीर्जुहोति प्रतिष्ठित्यै॥ (१८)

अस्मै त एव द्वादश च॥ [६]

मारुतमसि मरुतामोजोऽपां धारां भिन्द्धि रमयंत मरुतः श्येन-  
 मायिनं मनोजवसं वृषणं सुवृक्तिम्। येन शर्ध उग्रमवसृष्टमेति  
 तदश्विना परि धत्तं स्वस्ति। पुरोवातो वर्षञ्जिन्वरावृथ्स्वाहा  
 वातावद्वर्षन्नुग्ररावृथ्स्वाहा स्तनयन्वर्षन्भीमरावृथ्स्वाहाऽन-  
 शन्यवस्फूर्जन्दिद्युद्वर्षन्त्वेषरावृथ्स्वाहाऽतिरात्रं वर्षन्पूतिरावृथ्-  
 (१९)

स्वाहा बहु हायमवृषादिति श्रुतरावृथ्स्वाहाऽऽतपति  
 वर्षन्विराडावृथ्स्वाहावस्फूर्जन्दिद्युद्वर्षन्भूतरावृथ्स्वाहा मान्दा  
 वाशाः शुन्ध्यूरजिराः। ज्योतिष्मतीस्तमस्वरीरुन्दतीः सुफेनाः।  
 मित्रभृतः क्षत्रभृतः सुराष्ट्रा इह माऽवता वृष्णो अश्वस्य  
 सन्दानमसि वृष्ट्यै त्वोप नह्यामि॥ (२०)

पूतिरावृद्धिचत्वारिंशच्च॥ [७]

देवा॑ वसव्या॒ अग्ने॑ सोम सूर्य॑। देवाः॑ शर्मण्या॒ मित्रा॑वरुणार्थमन्त्र॑।  
 देवाः॑ सपीत॒योऽपा॑ नपादाशुहेमन्त्र॑। उ॒द्रो द॑त्तोऽदधि॑ भि॒न्त दि॒वः  
 प॒र्जन्या॑दन्तरि॒क्षात्पृथि॑व्यास्ततो॑ नो वृ॒ष्ट्या॑ऽवत। दिवा॑ चि॒त्तमः॑  
 कृ॒ण्वन्ति प॒र्जन्ये॑नोदवा॒हेन॑। पृथि॒वीं यद्बु॑न्दन्ति॑। आ यं नरः  
 सु॒दान॑वो ददा॒शुषे॑ दि॒वः को॒शम॑चु॒च्यवुः। वि प॒र्जन्याः॑ सृजन्ति॒  
 रोद॑सी॒ अनु ध॑न्व॒ना यन्ति॑ (२१)

वृ॒ष्टयः॑। उदी॑रयथा मरुतः समु॒द्रतो॑ यूयं वृ॒ष्टिं व॑र्षयथा  
 पुरी॑षिणः। न वो दस्त्रा॒ उप॑ दस्यन्ति धे॒नवः॑ शुभं॑ या॒तामनु॑ रथां  
 अवृ॑त्सत। सृ॒जा वृ॒ष्टिं दि॒व आ॒द्भिः संमु॑द्रं पृ॒ण। अ॒ब्जा अ॑सि  
 प्रथ॑म॒जा बल॑मसि समु॒द्रियम्॑। उ॒न्न॑म्भय पृथि॒वीं भि॒न्द्दीदं॑ दि॒व्यं  
 नभः॑। उ॒द्रो दि॒व्यस्य॑ नो दे॒हीशा॑नो वि सृ॒जा दृ॒तिम्। ये दे॒वा  
 दि॒विभा॑गा ये॑ऽन्तरि॒क्षभा॑गा ये पृथि॒विभा॑गाः। त इ॒मं य॒ज्ञम॑वन्तु॒  
 त इ॒दं क्षे॒त्रमा॑ वि॒शन्तु॑ त इ॒दं क्षे॒त्रम॑नु वि वि॒शन्तु॑॥ (२२)

यन्ति देवा वि॒शन्ति॑॥

[८]

मा॒रु॒तम॑सि म॒रुता॑मोज॒ इति॑ कृ॒ष्णं वा॑सः कृ॒ष्णतू॑षं परि॑ धत्त  
 ए॒तद्वै वृ॒ष्ट्यै रू॒पं स॑रू॒प ए॒व भू॒त्वा प॒र्जन्यं॑ व॒र्षय॑ति र॒मय॑त मरुतः  
 श्ये॒नमा॑यि॒नमि॑ति पश्चाद्वा॒तं प्र॑ति मी॒वति॑ पुरोवा॒तमे॒व ज॑नयति  
 व॒र्षस्या॑व॒रुद्धौ॑ वा॒तना॑मानि जुहोति वा॒युर्वै वृ॒ष्ट्या ई॒शे वा॒युमे॒व  
 स्वेन॑ भा॒गधे॑ये॒नोप॑ धावति॒ स ए॒वास्मै॑ प॒र्जन्यं॑ व॒र्षय॑त्य॒ष्टौ (२३)



जुहोति चतस्रो वै दिशश्चतस्रोऽवान्तरदिशा दिग्भ्य एव  
 वृष्टिः सम्प्र च्यावयति कृष्णाजिने सं यौति हविरेवाकरन्तर्वेदि  
 सं यौत्यवरुद्धौ यतीनामद्यमानानां शीर्षाणि परापतन्ते खर्जूरा  
 अभवन्तेषां रस ऊर्ध्वोऽपतत् तानि करीराण्यभवन्सौम्यानि  
 वै करीराणि सौम्या खलु वा आहुतिर्दिवो वृष्टिं च्यावयति  
 यत्करीराणि भवन्ति (२४)

सौम्ययैवाऽऽहुत्या दिवो वृष्टिमव रुन्धे मधुषा सं यौत्यपां  
 वा एष ओषधीनां रसो यन्मध्वद्ध्य एवौषधीभ्यो वर्षत्यथो  
 अद्ध्य एवौषधीभ्यो वृष्टिं नि नयति मान्दा वाशा इति सं  
 यौति नामधेयैरेवेना अच्छैत्यथो यथा ब्रूयादसावेहीत्येवमेवेना  
 नामधेयैरा (२५)

च्यावयति वृष्णो अश्वस्य सन्दानमसि वृष्ट्यै त्वोप नह्यामीत्याह  
 वृषा वा अश्वो वृषा पर्जन्यः कृष्ण इव खलु वै भूत्वा वर्षति  
 रूपेणैवेनं समर्धयति वर्षस्यावरुद्धौ ॥ (२६)

अष्टौ भवन्ति नामधेयैरेकात्रिंशच्च ॥ [९]

देवा वसव्या देवाः शर्मण्या देवाः सपीतय इत्या बध्नाति  
 देवताभिरेवान्वहं वृष्टिमिच्छति यदि वर्षेत् तावत्येव होतव्यं यदि  
 न वर्षेच्छ्वो भूते हविर्निर्वपेदहोरात्रे वै मित्रावरुणावहोरात्राभ्यां खलु  
 वै पर्जन्यो वर्षति नक्तं वा हि दिवा वा वर्षति मित्रावरुणावेव

स्वेन॑ भाग॒धेये॒नोप॑ धावति॒ तावे॒वास्मा॑ - (२७)

अहोरा॒त्राभ्यां॑ पु॒र्जन्यं॑ व॒र्षय॑तोऽग्नये॑ धाम॒च्छदे॑ पुरो॒डाशं॑म॒ष्टा-  
क॑पालं॒ निर्व॑पेन्मारु॒तः स॒प्तक॑पालः सौर्यमेकं॑कपालम॒ग्निर्वा इ॒तो  
वृष्टि॑मुदीरयति म॒रुतः॑ सृष्टां नयन्ति यदा खलु वा अ॒सावा॑दित्यो  
न्यङ्ग॑श्मिभिः पर्याव॑र्ततेऽथ व॒र्षति॑ धाम॒च्छदिव॑ खलु वै भू॒त्वा  
व॑र्षत्ये॒ता वै दे॒वता॑ वृष्ट्या॑ ईशते॒ ता ए॒व स्वेन॑ भाग॒धेये॒नोप॑ धावति॒  
ता - (२८)

ए॒वास्मै॑ पु॒र्जन्यं॑ व॒र्षय॑न्त्यु॒ताव॑र्षिष्यन्व॒र्षत्ये॒व सृ॒जा  
वृष्टिं॑ दि॒व आ॒द्भिः स॑मु॒द्रं पृ॒णेत्या॑हेमाश्चै॒वामू॑श्चापः स॒मर्ध॑यत्यथो  
आ॒भिरे॒वामू॑रच्छैत्य॒जा अ॑सि प्रथम॒जा बल॑मसि स॒मुद्रि॑यमित्या॑ह  
यथाय॒जुरे॒वैतदु॑न्न॒म्भय॑ पृथि॒वीमि॑ति व॒र्षा॒ह्वा जु॑होत्येषा वा  
ओष॑धीनां वृष्टि॒वनि॒स्तयै॒व वृष्टि॑मा च्यावयति॒ ये दे॒वा दि॒विभा॑गा  
इति॑ कृष्णाजि॒नम॑वं धू॒नोती॑म ए॒वास्मै॑ लो॒काः प्री॒ता अ॒भीष्टा॑  
भवन्ति॥ (२९)

अ॒स्मै धा॒वति॒ ता वा एक॑विंशतिश्च॥ [१०]

सर्वा॑णि छन्दा॑ः स्ये॒तस्या॑मि॒ष्ट्याम॑नू॒च्यानी॒त्याहु॑स्त्रि॒ष्टुभो॑ वा  
ए॒तद्वी॒र्यं यत्क॑कुदु॒ष्णिहा॑ जग॑त्यै यदु॒ष्णिह॑क॒कुभा॑वन्वाह तेनै॒व  
सर्वा॑णि छन्दा॑ः स्य॒वं रु॒न्धे गा॒यत्री॑ वा ए॒षा यदु॒ष्णिहा॑ या॒नि  
च॒त्वार्य॑ध्य॒क्षरा॑णि चतु॑ष्पाद ए॒व ते प॒शवो॑ यथा॑ पुरो॒डाशं॑

पुरोडाशोऽध्येवमेव तद्यदृच्यध्यक्षराणि यज्ञगत्या (३०)

परिदध्यादन्तं यज्ञं गमयेत् त्रिष्टुभा परि दधातीन्द्रियं वै वीर्यं  
त्रिष्टुगिन्द्रिय एव वीर्यं यज्ञं प्रतिष्ठापयति नान्तं गमयत्यग्ने त्री ते  
वाजिना त्री षधस्थेति त्रिवत्या परि दधाति सरूपत्वाय सर्वो वा एष  
यज्ञो यत् त्रैधातवीयं कामायकामाय प्र युज्यते सर्वेभ्यो हि कामेभ्यो  
यज्ञः प्रयुज्यते त्रैधातवीयेन यजेताभिचरन्सर्वो वा - (३१)

एष यज्ञो यत् त्रैधातवीयः सर्वेणैवैनं यज्ञेनाभि चरति स्तृणुत  
एवैनमेतयैव यजेताभिचर्यमाणः सर्वो वा एष यज्ञो यत् त्रैधातवीयः  
सर्वेणैव यज्ञेन यजते नैनमभिचरन्स्तृणुत एतयैव यजेत सहस्रेण  
यक्ष्यमाणः प्रजातमेवैनद्वदात्येतयैव यजेत सहस्रेणेजानोऽन्तं वा  
एष पशूनां गच्छति (३२)

यः सहस्रेण यजते प्रजापतिः खलु वै पशूनंसृजत ताः  
स्रैधातवीयेनैवासृजत य एवं विद्वाः स्रैधातवीयेन पशुकामो यजते  
यस्मादेव योनेः प्रजापतिः पशूनंसृजत तस्मादेवैनान्सृजत  
उपैनमुत्तरः सहस्रं नमति देवताभ्यो वा एष आ वृश्च्यते यो यक्ष्य  
इत्युक्त्वा न यजते त्रैधातवीयेन यजेत सर्वो वा एष यज्ञो - (३३)

यत् त्रैधातवीयः सर्वेणैव यज्ञेन यजते न देवताभ्य आ वृश्च्यते  
द्वादशकपालः पुरोडाशो भवति ते त्रयश्चतुष्कपालास्त्रिः षमृद्धत्वाय  
त्रयः पुरोडाशा भवन्ति त्रय इमे लोका एषां लोकानामाप्त्या

उत्तर॑उत्तरो॒ ज्याया॑न्भवत्ये॒वमि॑व ही॒मे लो॒का य॑वमयो॒ मध्य॑ ए॒तद्वा  
अन्तरि॑क्षस्य रूप॑ः समृ॑द्धौ सर्व॑षामभिग॒मय॑न्न॒व द्य॒त्यछ॑म्बद्गार॒ः  
हिर॑ण्यं ददाति॒ तेज॑ ए॒वा- (३४)

व॑ रु॒न्धे ता॒र्प्यं द॑दाति प॒शूने॒वाव॑ रु॒न्धे धे॒नुं द॑दात्या॒शिष॑ ए॒वाव॑  
रु॒न्धे सा॒मो वा ए॒ष वर्णो॑ यद्वि॒रण्यं॑ यजु॑षां ता॒र्प्यमु॑क्थाम॒दाना॑  
धे॒नुरे॒ताने॒व सर्वा॑न् वर्णा॒नव॑ रु॒न्धे॥ (३५)

जग॑त्याऽभिचर॒न्धसर्वो॑ वै गच्छति य॒ज्ञस्तेज॑ ए॒व त्रि॒ःश॒ब्दः॥ [११]

त्वष्टा॑ ह॒तपु॑त्रो॒ वीन्द्र॑ः सोम॒माह॑रत् तस्मि॒न्निन्द्र॑ उप॒ह्वमै॑च्छत्  
तं नोपा॑ह्वयत् पु॒त्रं मै॒ऽवधी॑रिति॒ स य॑ज्ञवेश॒सं कृ॒त्वा प्रा॑सहा  
सोम॑मपिबत् तस्य॒ यद॒त्यशि॑ष्यत् तत्त्वष्टा॑हवनीयमुप॒ प्राव॑र्तयथ॒-  
स्वाहेन्द्र॑शत्रुर्वध॒स्वेति॑ स याव॑दूर्ध्वः प॒रावि॑ध्यति॒ ताव॑ति स्व॒यमे॒व  
व्य॑रमत् यदि॒ वा ताव॑त्प्रव॒ण- (३६)

मासी॒द्यदि॑ वा॒ ताव॑दध्य॒ग्रेरासी॑त्स स॒म्भव॑न्न॒ग्रीषोमा॑वभि  
सम॑भवत्स इ॒षुमा॑त्रमि॒षुमा॑त्रं विष्व॑ङ्गुवर्धत् स इ॒माँल्लो॑कान॒वृणो॑द्य॒-  
दिमाँल्लो॑कान॒वृणो॑त् तद्वृ॒त्रस्य॑ वृ॒त्रत्वं तस्मा॑दिन्द्रो॒ऽबिभे॑दपि॒ त्वष्टा॑  
तस्मै॒ त्वष्टा॑ वज्र॑मसिञ्चत् तपो॒ वै स वज्र॑ आसीत् तमुद्य॑न्तुं  
नाश॑क्रोदथ॒ वै तर्हि॑ विष्णु॑- (३७)

र॒न्या दे॒वता॑सी॒त्सोऽब्र॑वीद्विष्ण॒वेही॑दमा ह॒रिष्या॒वो  
येना॒यमि॑दमिति॒ स विष्णु॑स्त्रेधाऽऽत्मानं॒ वि न्य॑धत्त पृथि॒व्यां

तृतीयमन्तरिक्षे तृतीयं दिवि तृतीयमभिपर्यावर्ताच्चबिभेद्यत्पृथिव्यां  
तृतीयमासीत् तेनेन्द्रो वज्रमुदयच्छद्विष्ण्वनुस्थितः सौऽब्रवीन्मा मे  
प्र हारस्ति वा इदं (३८)

मयि वीर्यं तत्ते प्र दास्यामीति तदस्मै प्रायच्छत् तत्  
प्रत्यगृह्णादधा मेति तद्विष्णवेति प्रायच्छत् तद्विष्णुः प्रत्य-  
गृह्णादस्मास्विन्द्र इन्द्रियं दधात्विति यदन्तरिक्षे तृतीयमासीत्  
तेनेन्द्रो वज्रमुदयच्छद्विष्ण्वनुस्थितः सौऽब्रवीन्मा मे प्र हारस्ति वा  
इदं (३९)

मयि वीर्यं तत्ते प्र दास्यामीति तदस्मै प्रायच्छत्  
तत्प्रत्यगृह्णाद् द्विर्माधा इति तद्विष्णवेति प्रायच्छत् तद्विष्णुः प्रत्य-  
गृह्णादस्मास्विन्द्र इन्द्रियं दधात्विति यद्विवि तृतीयमासीत् तेनेन्द्रो  
वज्रमुदयच्छद्विष्ण्वनुस्थितः सौऽब्रवीन्मा मे प्र हार्येनाह- (४०)

मिदमस्मि तत्ते प्र दास्यामीति त्वी (३) इत्यब्रवीत्सन्धान्तु  
सं दधावहै त्वामेव प्र विशानीति यन्मां प्रविशेः किं मां भुञ्ज्या  
इत्यब्रवीत् त्वामेवेन्धीय तव भोगाय त्वां प्र विशेषमित्यब्रवीत्तं वृत्रः  
प्राविशदुदरं वै वृत्रः क्षुत्खलु वै मनुष्यस्य भ्रातृव्यो य - (४१)

एवं वेद हन्ति क्षुधं भ्रातृव्यं तदस्मै प्रायच्छत् तत्प्रत्यगृह्णात्  
त्रिर्माधा इति तद्विष्णवेति प्रायच्छत् तद्विष्णुः प्रत्यगृह्णादस्मास्विन्द्र  
इन्द्रियं दधात्विति यत् त्रिः प्रायच्छत् त्रिः प्रत्यगृह्णात् तत्

त्रिधातोऽस्त्रिधातुत्वं यद्विष्णुरन्वतिष्ठत् विष्णवेति प्रायच्छत्  
 तस्मादैन्द्रावैष्णवः हविर्भवति यद्वा इदं किं च तदस्मै  
 तत्प्रायच्छद्वचः सामानि यजूंषि सहस्रं वा अस्मै तत्प्रायच्छत्  
 तस्मात्सहस्रदक्षिणम्॥ (४२)

प्रवृणं विष्णुर्वा इदमिदमहं यो भवत्येकविंशतिश्च॥ [१२]

देवा वै राज्ञ्याञ्जायमानादबिभयुस्तमन्तरेव सन्तं  
 दाम्नापौम्भन्त्स वा एषोऽपोब्धो जायते यद्राज्न्यो यद्वा एषो-  
 ऽनपोब्धो जायेत वृत्रान्धः श्वरेद्यं कामयेत राज्ञ्यमनपोब्धो जायेत  
 वृत्रान्धः श्वरेदिति तस्मा एतमैन्द्राबारहस्पत्यं चरुं निर्वपेदैन्द्रो वै  
 राज्ञ्यो ब्रह्म बृहस्पतिर्ब्रह्मणैवैनं दाम्नोऽपोम्भनान्मुञ्चति हिरण्मयं  
 दाम् दक्षिणा साक्षादेवैनं दाम्नोऽपोम्भनान्मुञ्चति॥ (४३)

एनं द्वादश च॥ [१३]

नवोनवो भवति जायमानोऽह्नां केतुरुषसामेत्यग्रे। भागं  
 देवेभ्यो वि दधात्यायन्त्र चन्द्रमास्तिरति दीर्घमायुः। यमादित्या  
 अः शुमाप्याययन्ति यमक्षितमक्षितयः पिबन्ति। तेन नो  
 राजा वरुणो बृहस्पतिरा प्याययन्तु भुवनस्य गोपाः। प्राच्यां  
 दिशि त्वमिन्द्रासि राजोतोदीच्यां वृत्रहन्वृत्रहाऽसि। यत्र यन्ति  
 स्रोत्यास्त- (४४)

जितं तै दक्षिणतो वृषभ एधि हव्यः। इन्द्रो जयाति न परां

जयाता अधिराजो राजसु राजयाति। विश्वा हि भूयाः पृतना  
 अभिष्टीरुपसद्यो नमस्यो यथासत्। अस्येदेव प्र रिरिचे महित्वं  
 दिवः पृथिव्याः पर्यन्तरिक्षात्। स्वराडिन्द्रो दम् आ विश्वगूर्तः  
 स्वरिरमत्रो ववक्षे रणाय। अभि त्वा शूर नोनुमोऽदुग्धा इव धेनवः।  
 ईशान- (४५)

मस्य जगतः सुवर्दशमीशानमिन्द्र तस्थुषः। त्वामिद्धि  
 हवामहे साता वाजस्य कारवः। त्वां वृत्रेष्विन्द्र सत्पतिं नरस्त्वां  
 काष्ठास्वर्वतः। यद्वाव इन्द्र ते शतं शतं भूमीरुत स्युः। न त्वां  
 वज्रिन्त्सहस्रं सूर्या अनु न जातमष्ट रोदसी। पिबा सोममिन्द्र  
 मन्दतु त्वा यं तै सुषाव हर्यश्वाद्रिः। (४६)

सोतुर्बाहुभ्यां सुयतो नार्वी। रेवतीर्नः सधमाद इन्द्रे सन्तु  
 तुविवाजाः। क्षुमन्तो याभिर्मदेम। उदग्ने शुचयस्तव वि ज्योतिषोदु  
 त्यं जातवेदसं सप्त त्वा हरितो रथे वहन्ति देव सूर्य। शोचिष्केशं  
 विचक्षण। चित्रं देवानामुदगादनीकं चक्षुर्मित्रस्य वरुणस्याग्नेः। आ-  
 ऽप्रा द्यावापृथिवी अन्तरिक्षं सूर्य आत्मा जगतस्तस्थुष- (४७)

श्च। विश्वे देवा ऋतावृधं ऋतुभिर्हवनश्चतः। जुषन्तां युज्यं  
 पयः। विश्वे देवाः शृणुतेमं हवं मे ये अन्तरिक्षे य उप द्यवि ष्ठा ये  
 अग्निजिह्वा उत वा यजत्रा असद्यास्मिन्बर्हिषि मादयध्वम्॥ (४८)

[देवा मनुष्यां देवासुरा अंब्रुवन्देवासुरास्तेषांङ्गायत्री प्रजापतिस्ता यत्राग्ने गोभिश्चित्रयां मारुतन्देवां  
 वसव्या अग्ने मारुतमिति देवां वसव्या देवाः शर्मण्यास्त्वष्टां हतपुत्रो देवा वै राज्ञ्यान्नवोनवश्चतुर्दश॥१४॥  
 देवा मनुष्याः प्रजां पशून्देवां वसव्याः परिदध्यादिदमस्म्यष्टाचत्वारिंशत्॥४८॥ देवा मनुष्या मादयध्वम्॥]

---

This PDF was downloaded from <http://stotrasamhita.github.io>.

GitHub: <http://stotrasamhita.github.io> | <http://github.com/stotrasamhita>

Credits: <http://stotrasamhita.github.io/about/>

---